



真誥序



誥者告也書有湯誥洛誥諸篇

孔安國云誥以大義告乎天下者

是也經有緯緯者相經緯也其

事皆足以輔翼乎經故言緯也

真誥之作其緯於經者乎其目自

運象至於翼真檢者凡七蓋有象

其言 序
手緯能通手緯必知誥矣陶君之
意亦謂卦六十四道之玄也道德
五千言玄之道也其餘賸玄之奧
鉤玄之微能與易老貫者各形乎
言各見乎事雖然事與言非玄矣
其書所載往往出乎緯之所以輔
經者予少耽黃老說搜索道家者

流幾千家殫精日月無能深鑿
其鍵嘗接江西道士吳靜極言玄
事靜曰誤矣余驚拜曰願學道靜
曰讀易乎讀易足矣後乃以易悟
所得者易也陶君固甚知道凡有
啓於後學者其或自此始歟太乙
宮高士玉京外臣易如剛告予以

茅山栞真誥欲叙其略昔者沈約
遺陶君書深言先生糠粃流俗超
然獨覽名書絳簡至理精微惟歆
下風問道未知厥路若有屬於誥
者矣然陶君銘茅山曲林館廼云
祈生翊命各謂知道參差經術跌
宕辭藻是數語者全為誥設此翁

一銘猶足為山中無窮清風况書
乎嘉定十六年十一月冬至日朝散
大夫行祕書郎高似孫叙

萬曆庚子中秋日雲間王徹書



真誥卷之一
三

真誥卷之一



梁華陽隱居陶弘景撰

明震維居士俞安期校

運象篇第一

萼綠華詩

神嶽排霄起飛峰鬱千尋寥籠靈谷虛瓊林

蔚蕭森

①

此一字被墨濃贍不復可識正中抽一脚出下似是羊字其人名權

生標美秀弱冠流清音棲情莊慧津超形象

魏林揚彩朱門中內有邁俗心我與夫子族

真誥

卷之一

三

源胄同淵池宏宗分上業於今各異枝蘭金
 因好著三益方覺彌靜尋欣斯會雅綜彌齡
 祀誰云幽鑿難得之方寸裏翹想籠樊外俱
 為山巖士無令騰虛翰中隨驚風起遷化雖
 由人蕃羊未易擬所期豈朝華歲暮於吾子
 萼綠華者自云是南山人不知是何山也女
 子年可二十上下青衣顏色絕整以升平三
 年十一月十日夜降△△剪缺此兩字即自應是羊權字
 此往來一月之中輒六過來耳云本姓△△又剪

除此一字贈此後人 詩一篇并

致火澣布手巾一枚金玉條脫各一枚條脫

乃太而異精好神女語見此本是草作權字後人贍作見字而

乙上 君慎勿泄我泄我則彼此獲罪訪問此

人云是九嶷山中得道女羅郁也宿命時曾

為師母毒殺乳婦玄州以先罪未滅故令謫

降於臭濁以償其過與權此權亦草作故似前體而不被贍耳

尸解藥今在湘東山本懸此 此女已九百歲

矣尋此應是降羊權權字道輿忱之少子後為晉簡文黃門郎即羊欣祖故欣亦修道

服食也此乃為楊君所書者當以其同姓亦可楊權相問因答其事而疏說之耳按升平三年是巳未歲在乙丑前六年眾真並未降事

右三條楊君草書於紙上

南嶽夫人與弟子言書識如左

弟子即楊君自稱也此眾

真似是集洞宮時所以司命最在端當為主人故也夫人向楊說次第位號如此非降楊也時

東嶽上真卿司命君

東宮九微真人金闕上相青童大君

蓬萊右仙公賈寶安

鄭人自此後皆是稱諸真人之字非其人名也

氏族亦見世道書傳中也

清虛小有天王王子登

按青童高尊乃可不敢稱諱字此清虛是

南嶽之師尚稱字獨不顯茅司命字亦為難詳也

桐柏真人右弼王領五嶽司侍帝晨王子喬

青蓋真人侍帝晨郭世幹

衛人

戎山真人太極右仙公范伯華

幽人

少室真人北臺郎劉千壽

沛人

蟠冢真人左禁郎王道寧

常山人

大梁真人魏顯仁

長樂人

岷山真人陰友宗

陸渾真人太極監西郭幼度

九嶷山侯張上貴楚人

岱宗神侯領羅艷右禁司鮑元節東海人

華山仙伯秦叔隱馮翊人

葛衍真人周季通

陽洛真人領西歸傳淳于太玄西域人

潛山真伯趙祖陽涿郡人

勾曲真人定錄右禁郎茅季偉

鬱絕真人裴玄人

白水仙都朱交甫

三官保命司茅思和

太和真人山世遠

右二十三真人坐西起南向東行此於禮

向以西方為上而後女真東向則應起南今反北者當是以側近高真故也

太和靈嬪上真左夫人

北海六微玄清夫人

北漢七靈右夫人

太極中華右夫人

紫微左宮王夫人

滄浪雲林右英夫人

按右英是紫微姊今反在後當位業有升降耳

上真司命南嶽夫人

此即魏夫人也自說故不稱姓

八靈道母西嶽蔣夫人

按有數號者並以多為高西王母稱九靈

則八靈宜在七靈前而今反在後者亦所未詳又受讀黃庭事云北嶽蔣夫人與今不同

上真東宮衛夫人

方丈臺昭靈李夫人

紫清上宮九華安妃

朱陵北絕臺上嬪管妃

北嶽上真山夫人

西漢夫人

長陵杜夫人

右十五女真東向坐北起南行

說此事時雖不記月

日不知在何年既是衆真名位故出以居前按衆真位號前云以為高者猶今世之徽號也

六月二十一日夜定錄問云許長史欲云何

尋道登答勤修真誠之意定錄又言昔有趙

叔臺王世卿亦言篤學而竟不如人意遂爲

北明公府所引此是乙丑年六月也自此前

答長史書論茅山中事此前又已有一授不

記何月日並在第四卷中自餘無有先此者

北明公府鄆都昔扉廓天津採華赤丘是時

宮中官屬也聲穎靈袂蒙塵華喬此卽應是說初降發煥

秀山高說延霄自謂玄響所振無往不豁既

濯以靈波實望與物榮菴既未能暢業駢羅

遊岫逐逸然後知悟言之際應玄至少於是

佛音弗駕而旋偃靜葛臺夫玄刃無親流鑒遁

真若以雲壁一往想齊獨邁俯自啓灑動應

潜逸始乃吾等並有欣慨耳往見況意相知

篤末書云伏覽聖記事跡淵妙金策素著青

錄玄定遂跨塵俗逍遙紫陽何蕭蕭之清遠

眇眇之真貴哉若能者矣請借來喻又云得

道之階錯厲精神靖躬信宿洗誠求矜如斯

而言道已邇也然夤夜之間宜篤經營乃後

得手結天維足浮靈網心遊太空目擊洞房

不待久日也若五情愆波三魂越去於是三

真告

真舞劍黃闕捷關耳可不力之可不力之
六月二十二日夜鷄鳴喻書此紫陽旨也

右二條有長史寫

清靈真人說寶神經云云

抄此修行事出在第三卷中不復兩

載

紫微夫人喻書如左云云

事亦在第三卷

興寧三年歲在乙丑六月二十三日夜喻書

此其夕先共道諸人多有耳目不聰明者欲

啓乞此法即夜有降者即乃見喻也

此楊君自記也

長史年出六十耳目欲衰故有咨請楊不欲指并託云諸人

又告云道士有耳重者云云

事亦在第三卷

右一條清靈真人言

真人告云擲頭理髮欲得過多

事亦在第三卷

右一條紫微夫人言

其夜初降者適入戶未坐自言今夕波聲如

雷弟子請問其故答云向見東海中大波耳

弟子者楊君自稱也

右南嶽夫人言

又告云汝憎血否答曰實憎之云血在路上若汝憎之當那得行又答曰當避之耳又云避之佳故不如目不見乃佳

右南嶽夫人言

自此後諸真共語耳

又云寶神經是裴清靈錦囊中書侍者常所帶者也裴昔從紫微夫人授此書也吾亦有俱如此寫西宮中定本

問西宮所在答云是玄圃北壇西瑤之上臺

也天真珍文盡藏於此中

右南嶽夫人言

裴真人又言此書與隱書同輩事要而即可

得用也一名七玄隱書

右二十三
日授訖此

南嶽夫人見告云紫微左夫人王諱清娥字愈意阿母第二十女也鎮羽野玄壟山主教當得成真入者

右一條先此一夕所授

此一條卽是二十
二日夜與紫陽所

喻同夕當復大應有事後云聲氣下亦是
此夕楊後又追憶此一事更疏在二十二

日例中故云
先此一夕也

右從清靈來凡十二條有長史寫

六月二十四日夜紫微王夫人來降因下地
請問真靈既身降於塵濁之人而手足猶未
嘗自有所書故當是卑高迹邈未可見乎敢
諮於此願誨蒙昧夫人因令復坐即見授令
書此以答曰此楊君自述事也例多如此夫汎景虛玄無
塗可尋言發空中無物可縱流浪乘忽化遁
不滯者也此二行皆浮沈冥淪儵遷灼寂是

故放蕩無津遂任鼓風柁存乎虛舟而行耳
故實中之空空中之有有中無象矣至於
書迹之示則揮形紙札文理曷注麤好外著
玄翰挺煥而範質用顯默藻斯坦形傳塵濁
苟騫露有骸之物而得與世進退上玷逸真
之詠下虧有隔之禁亦我等所不行靈法所
不許也今請陳爲書之本始也造文之既肇
矣乃是五色初萌文章畫定之時秀人民之
交別陰陽之分則有三元八會羣方飛天之

書又有八龍雲篆明光之章也其後逮二皇
之世演八會之文爲龍鳳之章拘省雲篆之
迹以爲順形梵書分破二道壞真從易配別
本支乃爲六十四種之書也遂播之于三十
六天十方上下也各各取其篇類異而用之
音典雖均蔚跡隔異矣校而論之八會之書
是書之至真建文章之祖也雲篆明光是其
根宗所起有書而始也今三元八會之書皇
上太極高真清仙之所用也雲篆明光之章

今所見神靈符書之字是也爾乃見華季之
世生造亂真共作巧末趣徑下書皆流尸濁
文淫僻之字舍本效假是囂穢死迹耳夫真
仙之人曷爲棄本領之文迹手畫淫亂之下
字耶夫得爲真人者事事皆盡得真也奚獨
於凡末之麤術淫浮之弊作而當守之而不
改玩之而不遷乎夫人在世先有能書善爲
事者得真仙之日外書之變亦忽然隨身而
自反矣真事皆邇者不復廢今已得之濁書

真言 卷之二
方又受學於上文而後重知真書者也鬼道亦然但書字有小乖違耳且以靈筆真手初不敢下交於肉人雖時當有得道之人而身未超世者亦故不敢下手陳書墨以顯示於字迹也至乃符文神藻所求所佩者自復始來而作耳所以爾者世人固不能了其端緒又使吾等不有隱諱耳冥中自相參解矣內外自相關矣又四極明科高上禁重亦自不聽我等復爲世間常書也我既下手子固不分矣

上真司命南嶽夫人授令書如左

若夫仰擲雲輪總轡太空手維霄網足陟玉庭身升帝闕披寶歛青上論九玄之逸度下紀萬椿之大生遂竦景電肅千霞煥明真言玄浪高譚玉清激朱唇之流徽運日氣之零零爰乃吐烽却煙彈金奏瓊鸞音積粲鳳唱

真言 卷之一
嘉聲耳若但應景下旋迴靈塵埃參輦弊宇
教拂朝市來成真才訓我弟子則玉振落響
琳鐘內抑周目五濁契濶愆室神勞臭腥填
鼻斂氣遂閉蘭音於中華之元退案金聲之
劣劣而發耳夫神者言微於邇萬里必接奇
韻雖觸錯鑿無滯故真理之既分聞遐則道
高邈璞不肆瑩而致有卑微之聰也今子乃
有心覺之至將致嫌似之思外觀流俗之對
內有遲疑之悟乎不運事宜亦已邁也望所
營者道研咏者妙耳道妙既得高下之音必
坦然矣此非所謀吾子加之至慮散蕩斯念
宜慎之耳

右三條有楊書

六月二十四日夜南嶽夫人見授令書此先
是二十二日夕有在別室共論講道紫微南
嶽二夫人聲氣語音殊下不解其趣今故授
書此以答所共講者之疑心也初來見授時
色氣猶不平授畢可爾弟子唯覺色有不平

都無他可道

此一條亦是楊君自記論

南嶽夫人其夕語弟子言我明日當詣王屋山清虛宮令汝知之所至也

其夕又言海東桐柏山西頭適崩二百許丈紫微王夫人云世人之思慮何得事事真審耶可不事有答其心也南嶽夫人言戲之耳欲建豎之也瑩實之也

興寧三年歲在乙丑六月二十五日夜

此是安妃

降事之端記錄別為一卷故更起年歲號首也

紫微王夫人見降又與一神女俱來神女着

雲錦襪上丹下青文彩光鮮腰中有綠繡帶

帶係十餘小鈴鈴青色黃色更相參差左帶

玉佩佩亦如世間佩但幾小耳衣服儵儵有

光照朗室內如日中映視雲母形也雲髮鬢

此應是鬢字鬢黑髮貌也鬢整頓絕倫作髻乃在頂中又

垂餘髮至腰許指着金環白珠約臂視之年

可十三四許左右又有兩侍女其一侍女着

朱衣帶青章囊手中又持一錦囊囊長尺一

二寸許以盛書書當有十許卷也以白玉檢
 檢囊口見刻檢上字云玉清神虎內真紫元
 丹章其一侍女着青衣捧白箱以絳帶束絡
 之白箱似象牙箱形也二侍女年可堪十七
 八許整飾非常神女及侍者顏容瑩朗鮮徹
 如玉五香馥芬如燒香嬰氣者也

香嬰者嬰香也出外

國初來入戶在紫微夫人後行夫人既入戶
 之始仍見告曰今日有貴客來相詣論好也
 於是某即起立夫人曰可不須起但當共坐

自相向作禮耳夫人坐南向某其夕先坐承
 牀下西向神女因見就同牀坐東向各以左
 手作禮作禮畢紫微夫人曰此是太虛上真
 元君金臺李夫人之少女也太虛元君昔遣
 詣龜山學上清道道成受太上書署為紫清
 上宮九華真妃者也於是賜姓安名鬱嬪字
 靈簫紫微夫人又問某世上曾見有此人不
 某答曰靈尊高秀無以為喻夫人因大笑於
 爾如何某不復答紫清真妃坐良久都不言

真詩 卷之一
妃手中先握三枚棗色如乾棗而形長大內
無核亦不作棗味有似於梨味耳妃先以一
枚見與次以一枚與紫微夫人自留一枚語
令各食之食之畢少久許時真妃問某年幾
是何月生某登答言三十六庚寅歲九月生
也真妃又曰君師南真夫人司命秉權道高
妙備實良德之宗也聞君德音甚久不圖今
日得叙因緣歡願於冥運之會依然有松蘿
之纏矣某乃稱名答曰沈洎下俗塵染其質

高卑雲邈無緣稟敬猥虧靈降欣踊罔極唯
蒙啓訓以祛其闇濟某元元宿夜所願也真
妃曰君今語不得有謙飾謙飾之辭殊非事
宜又良久真妃見告曰欲作一紙文相贈便
因君以筆運我鄙意當可爾乎某答奉命卽
襞紙染筆登口見授作詩如左詩曰

雲闕豎空上瓊臺聳鬱羅紫宮乘綠景靈觀
藹嵯峨琅軒朱房內上德煥絳霞俯漱雲瓶
津仰掇碧柰花濯足玉天池鼓柷牽牛河遂

策景雲駕落龍轡玄阿振衣塵滓際褰裳步
濁波願爲山澤結剛柔順以和相攜雙清內
上真道不邪紫微會良謀唱納享福多某書
訖取視之乃曰今以相贈以宣丹心勿云云
也若意中有不相解者自有微訪耳

紫微夫人曰我復因爾作一紙文以相曉者
以示善事耳某又襞紙染筆夫人見授詩云
二象內外泮玄氣果中分冥會不待駕所其
貴得真南嶽鑄明金眇觀傾笈帟良德飛霞

照遂感靈霄人乘颿儔衾寢齊牢攜絳雲悟
歎天人際數中自有緣上道誠不邪塵滓非
所聞同日咸恒象高唱爲爾因書訖紫微夫
人取視視畢曰以此贈爾今日於我爲因緣
之主唱意之謀客矣紫微夫人又曰明日南
嶽夫人當還我當與妃共迎之於雲陶間明
日不還者乃復數日事又良久紫微夫人曰
我去矣明日當復與真妃俱來詣爾也覺下
牀而失所在也真妃少留在後而言曰冥情

未攄意氣未忘想君俱咏之耳明日當復來
乃取其手而執之而自下牀未出戶之間忽
然不見

六月二十六日夕衆真來疏如左

紫微王夫人

紫清上宮九華真妃

上真司命南嶽夫人某師

凡此前後云某者皆楊君自隱名也

紫陽真人

茅中君

清靈真人

茅小君

又有一人年甚少整頓非常建芙蓉冠著朱
衣以白珠綴衣縫帶劍都未曾見此人來多
論金庭山中事與衆真共言又有不可得解
者揖敬紫微紫清南真三女真餘人共言平
耳云是桐柏山真人王子喬也都與某語
又前後初有真人來見降者時皆自不即與
某共語耳

各坐良久紫清真妃曰欲復煩明君之手筆
書一事以散意忘言可乎某又襞紙待授真
妃乃徐徐微言而授曰我是元君之少女太
虛李夫人愛子也昔初學真於龜臺受玉章
於高上荷虎錄於紫皇秉瓊鉞於天帝受書
於上真之妃以遊行玉清也常數自手扉九
羅足躡玄房霄形靈虛仰歎日根入宴七闕
出轡雲輪攝三辰而俱升散景霞以飛軒也
非不能採擇上室訪搜紫童求王宮之良儔

偶高靈而爲雙接玄引奇友于帝郎矣直是
我推機任會應度歷數俯景塵沫參龍下邁
招冥求之雄追得匹之黨耳自因宿命相與
乃有墨會定名素契玉鄉齊理二慶攜鴈而
行匏爵分味醮衾結裳顧儔中饋內藏真方
也推此而往已定分冥簡青書上元是故善
鄙之心亦已齊矣對景之好亦已域矣得願
而遊歡兼昔旨豈不冥乎自然此復是二象
大宗內外之配職耳實非所以變無反澹疑

情虛刃靈刀七累遺任太素保真啓玉單景
八空之謂也秀寂高深鬱輿流霄使鳳歌雲
路龍吟虎嘯天皇雙景遠升辰樓飛星擲光
日月映軀口吐冥煙眼激電光上寢瓊房流
行玉清手掣景雲足陟金庭若自此之時在
得道之頃爲當固盡內外理同金石情纏雙
好齊心幃幙耳爲必抱衾均牢有輕中之接
塵穢七神悲魂任魄乎蓋是妾求氏族於明
君耳非有邪也今可謂得志懷真情已如一

方當相與結駟玉虛偶行此玄同掇絳實於
玉圃併採丹華於閬園分飲於紫川之水齊
濯於碧河之濱紫華毛帔日冕蓉冠逍遙上
清俱朝三元八景出落鳳扉雲關仰漱金髓
咏歌玉玄浮空寢晏高會太晨四鈞朗唱香
母奏煙齊首偶觀攜帶交裙不亦樂乎不亦
得志乎明君其順運隨會妾必無辭且亦自
不得背實及冥苟任胷懷矣授畢復自取視
而言曰今以此書相詣庶豁其滯疑耳言畢

乃笑良久紫微夫人曰真妃之辭盡矣論好之緣著矣爾亦不得復有所容也玄運冥分使之然耳南嶽夫人見授書曰冥期數感玄運相適應分來聘新構因緣此攜真之善事也蓋示有偶對之名定內外之職而已不必苟循世中之弊穢而行淫濁之下迹矣偶靈妃以接景聘貴真之少女於爾親交亦大有進業之益得而無傷絕之慮耳千神於是可使試觀不得復陳矣真旌必可尅往雲輶必

可俱駕也吾往曾因紫微夫人爲汝構及此意今遂如願益使我欣欣慎勿復疑矧於心胷矣我昨見金臺李夫人於清虛中言爾尚有疑正之心色氣小有眼眼謂應作汝違此

恨恨字

舉誤人不小真妃有神虎內真丹青玉文非爾所有者輩良才求寫故當不爲隱耳今日相攜何但文章而已將必乘景玉霄乎若有未悟者宜微訪可否真妃見夫人書言乃笑而言攜手雙臺娛歎良會景輶同機於此齊

乎

真誥卷之一終

真誥卷之二

梁華陽隱居陶弘景撰
明震維居士俞安期校

運象篇第二

清虛真人授書曰黃赤之道混氣之法是張
陵受教施化爲種子之一術耳非真人之事
也吾數見行此而絕種未見種此而得生矣
百萬之中莫不盡被考罰者矣千萬之中誤
有一人得之得之遠至於不死耳張陵承此

以教世人耳陵之變舉亦不行此矣爾慎言
濁生之下道壞真霄之正氣也思懷淫慾存
心色觀而以兼行上道者適足明三官考罰
耳所謂抱玉赴火以金棺葬狗也色觀謂之
黃赤上道謂之隱書人之難曉乃至於此
紫微夫人授書曰夫黃書赤界雖長生之秘
要實得生之下術也非上宮天真流輶晏景
之夫所得言也此道在長養分生而已非上
道也有懷於淫氣兼以行乎隱書者適足握

水官之筆鳴三官之鼓耳玄挺亦不可得恃
解謝亦不可得賴也要而言之貞則靈降專
則神使矣

夫真人之偶景者所貴存乎匹偶相愛在於
二景雖名之爲夫婦不行夫婦之迹也是用
虛名以示視聽耳苟有黃赤存於冑中真人
亦不可得見靈人亦不可得接徒劬勞於執
事亦有勞於三官矣鷄鳴時南嶽夫人授書
曰鷄旣鳴矣論好之緣篤也

真誥 卷之二
紫陽真人授書曰太虛遠逸高卑同接體賢
之義著之於冥運耳慎心係於黃赤之疑也
茅中君授書曰玄標觸景俯和塵藹玉振愆
房清風逸邁可不勗之也

言畢諸真人去真妃少留在後曰又煩明君
爲一辭也而授書曰

忘懷蘭素暉心齊契方當數親虔清宇德與
流景合宜歡會理髮領秀伏度明君高尚靈
映縱滯忘鄙耳言畢持手而下牀未至戶之

間忽失所在

六月二十六日夜降八真人

紫微左夫人一

紫清上宮九華真妃二

上真司命南嶽夫人三

紫陽真人四

清靈真人五

茅中君六

茅小君七

真誥 卷之二
又有一人甚少整頓建芙蓉冠朱衣帶劍未曾見也意疑是桐柏山真人王子喬多論金庭山中事言多有不可解者恭敬紫微上真九華妃也

皆禮揖稱下官

此條重出而小異者前所書是楊君自記九華降事隱之

不出從此後是更疏說長史事以示長史故此一片兩本也

上真云昨與叔申請清虛宮校為仙真得失之事耳近頓除落四十七人都復上三人耳并復視爾輩之名簡如今佳耳許某乃得在

伯札中

許某即長史名也楊君疏呈故不載名耳

吾初不悟其如此益好也其洗心懃邁宗注理盡心丹意竭如履冰火若久如此者真人亦不得逃矣仙道亦不得隱矣但當杜絕其淫色之念吾等亦即可得見可疏示之此南

嶽夫人言

此即是前二十四日所道明日當詣王屋山事也

中君曰伯舉在於下官耳大老子將復可念江東未見有如此而懃道者然勿恃伯而忘道也虛妄者德之病華銜者身之災滯者失

之首耻者體之籥遣此四難然後始可以問道耳於是靈軫鳴轅日有彷彿也有淫愆之心勿以行上真之道也昨見清虛宮正落除此輩人名而方又被考罰以度付三官推之可不慎乎

右南嶽夫人言

許長史慎臨尸弔喪年內耳示許仙侯如此此小君言言畢大笑 忝心既忘得亦不同鄙耻不除生籍不書許長史雖已暫除當復曾除而復除

之

此清靈言

東卿司命甚知許長史之慈肅小有

天王昨問此人今何在修何道東卿答曰是

我鄉里士也

鄉里者謂句容與茅山同境耳非言本咸陽人也

內明真正外混世業乃良才也今修上真道

也此語乃稱人意略有伯形也

此南嶽夫人言

右從六月二十四日來凡二十四條並

有楊書

蕭邈真才內鏡外和曾參出丹田心同舟素

系三遷來庇方頭

此四句是離合作思玄字即長史之字也

錄名太極金書東州蹇裳七度耽凝洞樓內

累既消魂魄亦柔守之不倦積之勿休五難

既遣封伯作侯七度飛步事也洞樓洞房事也

右紫微王夫人所喻令示許長史

右一條有長史寫

紫微夫人喻曰披華蓋之側云云此事出在第三卷中

六月二十七日夜喻書此

右一條有楊書

積精所感萬物盡應妙誠未匝則形華不盡

形華不盡則洞房之中難即分明也吾昔受

此法常向西北存之耳西北存如小為易見

可明示如此西北為天地之爽內照之玄門也

六月二十七日紫陽所喻此二十七日眾真復降其事亦

應甚多並不出

右一條有長史寫

二君各有六僮裴君從者持青髦之節一僮

帶繡囊周君從者持黃髦之節無囊

右二條是甲手書

六月二十九日九華真妃授書曰

景應雙粲雲會玄落龍秀五空採瓊閭臺長
歌靈幙煥啓玉扉眇矣遺事與世長辭霞軫
絳波電赴紫樓共攜清響之外同遊雲岫廣
崖豈不善乎豈不樂哉日者霞之實霞者日
之精君唯聞服日實之法未見知餐霞之精
也夫餐霞之經甚秘致霞之道甚易此謂體
生玉光霞映上清之法也

眼者身之鏡耳者體之牖視多則鏡昏聽衆
則牖閉妾有磨鏡之石決牖之術卽能徹洞
萬靈眇察絕響可乎面者神之庭髮者腦之
華心悲則面焦腦減則髮素所以精元內喪
丹津損竭也妾有童面之經還白之法可乎
精者體之神明者身之寶勞多則精散營竟
則明消所以老隨氣落耄已及之妾有益精
之道延明之經可乎此四道乃上清內書立
驗之真章也方欲獻示以補助君之明照耳
授畢取以見與某口答唯唯乞請之也

六月二十九日夜桐柏真人同來降復諭授
令某書曰

夫八朗四極靈峰遼遐竒言吐穎瓊音餐振
晨飛陵清玄氣赴霄體邁玉虚心遺艱鋒沈
滯於眇羅之外凝和于寂波之表若此人者
必能旋騰玄漢周灑真庭矣三元可得而見
絳名可得而立耳如其心併愆浪目擊色袂
動與罔罟共啓靜興爭競之分者此乃適仙
路邈求生日濶也子其慎之某書畢取視乃

以見與

此前是桐柏辭也既同一夕安妃授
竟桐柏次授故云復授耳卒看如似
猶是安妃
故顯注之

六月三十日夜九華真妃與紫微王夫人南
嶽夫人同降真妃坐良久乃命侍女發檢囊
之中出二卷書以見付令寫之題如左

上清玉霞紫映內觀隱書

上清還晨歸童日暉中玄經

右二卷名目

此題本應是三元八會之書
湯君既究識真字今作隸字

顯出
之耳

七月一日夜紫微王夫人

南嶽夫人

九華真妃

紫陽

桐柏

清虛三真人

茅二君同降良久某乃自陳於衆靈求安身之術欲知貴賤之分年命之會多少定限於是真妃乃笑良久見授書此曰

明君夷質虛閑秘構玉朗蘭淵高流清響金宮可謂能珍寶藏竒幽真內煥標拂靈篇乘數順生素德神園丹錄玉清興煙拔景冥鼓遐聲也必三事大夫侍晨帝躬高佐四輔承制聖君理生斷死賞罰鬼神攝命千靈封山召雲主察陰陽之和氣而加爲吳越鬼神之君也妾將挺命凝觀憑華而生靈飛九天虛音颯房因運四覺玄梯同象紫名太上清文八景神映西暉德明內隸乃受書乘氣得爲

真妃之任矣又當助君總括三霍綜御萬神對命北帝制敕艷山又應相與攜袂靈房乘煙七元嘉會希林內攄因緣也是故君姓於楊我得爲安妾自發玄下造君自受書於西宮從北策景乘輶東轅握旄秉鉞專制東蕃三官奉芻河山啓源天丁獻武四甲衛輪當此之時實明君之至貴真仙之盛觀也三官中常有諺謠云楊安大君董真命神正我等之謂耳蓋聖皇之方駕於今有二十八年也

復二十二年明君將乘龍駕雲白日昇天先詣上清西宮北朝玉皇三元然後乃得東軫執事矣此自是君玉朗紫微金音虛領爲太極所旌乃玄德上挺不復用懃學劬勞陟足山川矣若爲精勗之者當小神清瑩鮮耳亦不甚今日不勞之舉也世俗縈網貴賤之間涉塵塗之役在得失之津信非真人所得經營乃自坦乎艱泰之用任乎遇否之頃耳見明君之逸誠欣然也覩明君之否誠感顏也

此二感發於顏色之上也復未足以致遠悲
抱長感矣至於內冥偶景併首玄好輕輪塵
藹參形世室妾豈以愆累浮卑少時之滯而
虧辱於當真之定質耶夫陰陽有對否泰反
用二象既羅得失錯綜此皆往來之徑陌耳
今人居風塵之休盛者乃多罪之下鬼趣死
之考質也夫處無用於囂塗乃得真之挺樸
任凡庸以內觀乃靈仙之根始也蓋富貴淫
麗是破骨之斧鋸有似載罪之舟車耳榮華

矜世爭競徼時適足以誨愆要辱爲伐命之
兵非佳事也是故古之高人覽罪咎之難豫
知富貴之不可享矣遂肥遯長林棲景名山
咀嚼和氣漱濯清川欲遠此惡迹自求多福
超豁絙聘保全至素者也君亦奚足汲汲於
人間之貴賤投身於榮辱之肆哉且方交兵
日會三災向臻神風驅除臭氣參天明金生
穢於泥瀆寶玉投糞以招塵褰衣振血濁精
虧真玄通遠逸是其時也君若其不耐風火

之煙欲抱真形於幽林者可且尋解劍之道
作告終之術乎自盡出嘿之會隱顯之跡臨
時分處有任於明君矣冥數上感有命而交
靈書玉臺真契合景是以言單於辭心訖於
筆妾豈獨歎於一人乎蓋示名分之判例也
書訖取以與某復曰君省此當少愈不

右從六月二十九日來凡十四條並楊
君自記書

東卿大君昨四更初來見降侍從七人入戶

一人執紫旄節一人執華幡一名十絕靈幡
一人帶綠章囊二人捧牙箱一人握流金鈴
乃年少於二弟二弟昨並倚立東卿命坐乃
坐耳良久言語委曲先昨神女來降意本疑
是王母女昨又來定是也南真說云是阿母
第十三女王媚蘭字申林治滄浪山受書爲

雲林夫人

此兩事並是七月五日夜略記後
更復委曲重數在後如此則右英

夫人始以七月三日
四日頻夕降也

右二條有楊自記

乙丑歲晉興寧三年七月四日夜司命東卿
君來降侍從七人入戶其一人執紫旄之節
其一人執華幡一名十絕靈幡一人帶綠章
囊其三人捧白牙箱箱中似書也其一人握
流金鈴侍人並朱衣司命君形甚少於二弟
着青錦繡帟紫毛帔巾芙蓉冠二弟並同來
倚立命坐乃坐耳言語良久七月六日夜司
命君又降良久喻書曰

若必範玄秉象清淨罕時遂拔群幽藻戢翼
高棲感味上契淵渟嶽峙蕭寥玉篇翫寶神
生遺放俗戀調彈清靈澄景虛中五道發明
色絕化浪慾與澹并空同冥衢無視無聽爾
乃遠齊妙真重起玄覺明德內圓靈標外足
矣終能策雲輶以赴霄書司命之丹錄耳若
精散萬念爲生不固无隨塵波心不真合適
足勞身神於林俎謂應作實有誤於來學也
其道微而易尋其道艱而難得乎亦令示許

長史

此二條又有長史寫

真告

卷之三

三

許長史欲山居

宗道者貴無邪棲真者安恬愉

至寂非弘順之主愴然非教授之匠故當因
煩以領无耳意云爾不代謝奚必四時氣如
呼吸千齡如寄趙子可憂不信而未疑其心
亦已醢矣

司命君與南嶽夫人言

爲道者常淵澹以獨處每棲神以遊閑安飲
啄以自足無旂謂應作眇於籠樊哀樂所以

長去天闕何由而臻者乎

稟志各有所宅資性咸有其韻豈可履逐物
之邪蹤矯我之正業乎

何不肆天標之極縱適求真之內娛從幽淨
以熙心綏所託以棲意處東山以晦跡握玄
筌於妙領保隨珠以含照遣五難於肯次耶

此三條亦似是東卿言

七月十五日夜紫微王夫人授書曰

勤精者味玄之靈標也凝安者拘真之寢衾

身言 卷之二
矣子勤澡丹心競赴高嶺可謂務道之柄懃
甚至也然道柔真虛守澹交物安靜任棲神
乃啓煥耳要而言之躁疾非盡理矣違之者
亦取勞乎

與許玉斧

七月十五日夜清靈真人授詩

企望人飛若感若成威不內接驕女遠屏三
四縱橫以入帝庭歷紀建號得爲太齡亦必
秀映四司元卿翻然縱羽遂登上清此離合
掾大名

名翽
字

與許玉斧

此夕又有中君授書與許卿答
欲知洞天之事今載在第四

卷中

鳳巢高木素衣衫然

此八字是作長
史小名穆字也

履順思

真凝心虛玄

仍取此思字玄字
即成長史字也

五公石腴彼

體所便急宜服之可以少顏三八令明次行
玄真解駕偃息可誦洞篇瓊刃應數此瓊刃
字即是

掾小名玉斧也與外傳
青錄義同故云應數

精心高棲隱嘿沈閑

正氣不虧木散除疾是爾所宜次服飶飯兼

穀勿違益髓除患肌膚充肥然後登山詠洞
講微

寅獸白齒

此四字卽是云虎牙也

亦能見機遂得不死

過度壬辰偃息盛木玩執周書

此八字卽是作楊字也

太極植簡金名西華學服可否自應靈符理
異契同神洞相求

定錄中候告

道藥事是定錄言也

此並離合譬喻四人姓名各詮所宜修行服御事尋辭意皆相貫次不知云何得兩人共說

寓言必可用不用是無情焉得駕歛迹尋此
空中靈微音良有旨當用慎勿輕事事應神
機保爾見太平

右右英吟此

茅定錄言良箴也可記之仙才不用心煩曲
故能得也

保命言

八月中彼人必東秀暫看燒香必也

保命臨去言

右從乙丑歲來凡十五條並有楊書

欽想風流託心靡景愧以愆昧鄙忝素彰思

自策勵沐浴陶冶濟否之階幸垂眷逮耳許

玄惶恐再拜

長史大名謚字思玄今此直云玄其意未允

詣賈先

生

此是長史史聞楊宣周紫陽說賈玄道等主知試校事故有此書賈卽以呈司命司命後所答云賈生近以此書來者也周君說事在第四卷中也

右一條是長史自書本也

太元真人以此書見與因授令書如左

若夫能眇邈於當世則所重唯身也罕營外難者則無死地矣是以古之學者握玄筌以藏領匿穎鏡於紛務凝神乎山巖之庭願真

於逸谷之津於是散髮高岫經緯我生暉暉景曜採吸五靈遊躡九道登元濯形投思絕空人事無營閉存三氣研諸妙精故能迴日薄之年反爲童嬰耳苟事累沙會交軒塞路但所守之不能勗也何試校之能停耶物物相要觸類興患天人之眇豈時漏哉所司賞於修業所試在於不日新矣賈生近以此書來託向疊疊可謂有情然無逝我梁有似逆詐耳

七月十六日

此一係又有緣書

又省所諮有心哉子望

對山嶺增懷遠想欣然稟向常見此意夫為

道者精則可矣有情不懃則無所能為也懃

而不專亦不能有成也要當令去心消豁穢

此後人驕作穢字不可復識

疾開散

此亦似東卿告長史

爾何以不

數看東山鬱望三秀徘徊華宇目擊林水平

彼人往殆無所復益耳

凡云三秀者皆謂三茅山之峰山頂為秀

故呼三秀也

右南嶽夫人與弟子言

夫言者性命之全敗也信者得失之關鍵也

張良二期可謂篤道而明心矣

右南嶽夫人與弟子言

性甚寬仁而所聞急而應物速者更違旨耳

火棗事未宜問也

論火棗事在後

右九華真妃言

右從太元來凡五條並楊書

轡景落滄浪騰躍清海津絳煙亂太陽羽蓋

傾九天雲輿浮空洞儵忽風波間來尋冥中

友相攜侍帝晨王子協明德齊首招玉賢下
眄八阿宮上寢希林顛漱此紫瓊腴方知穢
塗辛佳人將安在懃之乃得親

七月十八日夕雲林右英王夫人授詩

此詩與長

史兼及
掾事

高興希林虛遐遊無負方蕭條象數外有無
自冥同疊疊德韻和飄飄步太空盤桓任波
浪振鈴散風中內映七道觀可以得兼忘何
必反覆酬待此世文通玄心自宜悟嘿耳必

高蹤

七月二十六日夕紫微夫人喻作令與許長

史

絳闕扉廣霄披丹登景房紫旗振雲霞羽晨
撫八風停蓋濯碧谿採秀月支峰咀嚼三靈
華吐吸九神芒椿數無絕紀協日積童蒙攜
袂明真館仰期无上皇北鈞唱羽人玉玄粲
賢衆云何波浪宇得失爲我鍾引領囂庭內
開心擬穢衝習適榮辱域罕躡希林宮一靜

安足苦試去視滄浪

右右英夫人所喻

右從轡景來三篇並有長史寫

弱喪潤養篤靈未盡倚伏異因雲梯未抗雖
有懷於進趣猶未淵於至理矣君才實天工
以清瀾凝浪於高韻志棲神乎太玄期紫庭
而步空矣有心洞於飛滯柔翰蔚乎冥契也
動合規矩等圓殊方靜和真味吐納興音可
謂縱誕德挺良爲欽然矣然穢思不豁鄙吝

內固淫念不漸靈池未澄將未得相與論內
外之期況二景之交耳夫失機者貴在能改
相釋有情今無妨矣雖暫弭群聽故克和也
前途謂應作攸字邈此比非一漏緒多端當恒
戰密苟情有愆散得隨事失悟言微矣將何
以遏之將何以遣之

右七月二十六日夜雲林右英王夫人喻

書見與勿答

右一條有長史寫

世珍芬馥交道宗玄霄會振衣尋冥疇廻軒
風塵際良德映靈暉穎根粲華蔚密言多儻
福沖淨尚真貴咸恒當象順攜手同衾帶何
爲人事間日馬生患害

七月二十八日夕右英王夫人授書此詩

以與許長史

後十二月長史答書云咸恒之喻卽是酬此詩也咸恒義

出周易

右一篇有長史寫

清響散空神風灑林身超冥衢志詠靈音仁

侯其人也欲以裴真人本末示邾者可矣其
必克諧不善誘之心亦內彰也裴亦何人哉

邾卽惜也小名方回裴真人本末卽是清靈傳也有謝過及七經之士故令示之

八月七日夕右英王夫人授書令與許長

史

右一條楊書又有長史寫

守真一篤者一年使頭不白禿髮更生夫內
接兒孫以家業自羈外綜王事朋友之交耳
目廣用聲氣雜役此亦道不專也行事亦無

益矣夫真才例多隱逸棲身林嶺之中遠人間而抱澹則必櫻顏而玄鬢也

玉醴金漿交梨火棗此則騰飛之藥不比於金丹也仁侯體未真正穢念盈懷恐此物輩不肯來也苟真誠未一道亦無私也亦不當

試問

火棗交梨之樹已生君心中也心中猶有荆棘相雜是以二樹不見不審可剪荆棘出此樹單生其實幾好也

雖云問也其欲希之近也當為君問主領者三年更相問以即日始

丑年

此二字長史後益上

八月七日夜雲林右英王

夫人口授答許長史

凝心虛形內觀洞房抱玄念神專守真一者則頭髮不白禿者更軫軫字亦應是琴未有以百思

纏冑寒熱破神管此官務當此風塵口言吉

凶之會身扉

凡作扉字者皆是排音非扉扇之扉也

得失之門

衆憂若是萬慮若此雖有真心固為不篤抱

道不行握寶不用而自然望頭不白者亦希
聞也玉醴金漿交生神梨方丈火棗玄光靈
芝我當與山中許道士不以與人間許長史
也

八月七日夜紫微王夫人授答許長史

右六條有掾寫

擬駕東岑人停景招隱靜仁德乘波來俱會
三秀嶺靈芝信可食使爾無終永喻真獻金
漿不待百丈井

八月十六日夕清靈真人授

右一篇有長史寫

虛和可守雄蕭蕭可守雌夫蕭蕭者單景獨
往也君絳宮中渠能仰飛空同上上

謂應作詎字

雲玄之涯不道易聞而患不真書易得而患
不行若專如此大天之中盡真仙比肩也我
亦無咎於不能爲者

心不定而欲書將欲沽之哉意不往而求真
似欲銜之也願告

八月十七日夜右英王夫人授書此與許

長史

似答心求守雌之真一也

肇祖植德華條翁

隊

即謂七世祖許肇也隊字應作墜

頓足

懸車無早晚也但心堅注真微密靈機則可矣至於高逸長嶺寢冥林澤縱時事之難鄙遺九親而味神實美舉也心苟不專愆念填冑雖躡閬山以遊步造圓壘以朝冥然亦必敗也若必空空我自當相告有可動之時也今且未可議耶

八月十七日夜保命仙君小茅口授與許

長史

含仁守慈發拔幽憂單心慈誘棲神靈鏡者許長史其人也所恨在於應物速招真急耳夫浩挺虛映乃可守雌已求故當能守之守之蓋易恐亦宜無不可耶

八月十八日夜紫微王夫人授示許長史

右四條有楊書

穆奉被音告頻煩備至仰銜恩潤光華彌煥

披覽欣慶感荷罔極穆沈滯流俗豈忘拔迹
輒已誓之中心思爲階漸考室東山棲景林
壑此志必也此舉決也方當憑庇靈宗諮稟
神規若此之心揆亦鑒之真一之雌其道玄
遠妙出秘領穆愆穢未蕩俗累未拔胃心滓
濁精誠膚淺未敢預聞南真哀矜去春使經
師授以方諸洞房步綱之道八素九真以漸
修行不敢恪謂應作忘字懈九真至須幽靜人事
雜錯患在未專耳昔人學道尋師索友彌積

年載經歷山嶽無所不至契濶險試備嘗勞
苦然後授以要訣穆德薄罪厚端坐愆室橫
爲衆真所見採錄鑒戒繼至啓悟非一古人
有言非知之難其行之難夫人垂恩所賜自
可徐徐須此須字長史自儻移東山然後親授道之
來也不計遲速恩之隆也何限早晚命使願
告敢不上答謹白此長史答前右英論雌一事者據爲書之既被儻更

寫故此本
得存焉

真誥卷之二



